

DOMENIE V DI CUARESIME

Jutoris pe Liturgjie

Domenie, ai 18 di Març dal 2018

La colete de messe di vuê e domande al Signor nestri Diu di vê la gracie di cjatâsi ancje nô a cjaminâ cun pas rissolût, su la strade di chê caritât ch'e à sburtât to Fi a consegnâsi a la muart pal ben che i voleve al mont. Meditant sore chestis peraulis: pas rissolût... chê caritât... consegnâsi a la muart... o sintin di podê acetâ un tâl troi dome par gracie, par une lûs interiôr che nus ven donade.

Di fat vuê si conclût un cjapitul e si comence une pagjine gnove: te prime leture o scoltin: sentence dal Signôr! - o farasai cu la cjase di Israel e cu la cjase di Gjude un pat gnûf e tal vanzeli o sintin che intant de fieste, a 'nd jere ancje un pôcs di grêcs che o podaressi ancje dî: i forecj, rifugjâts, blancs o neris, che a son fra di nô.

Al è un grant moment, un varc, sedi te storie dal popul di Israel ai timps dal profete Gjeremie (secul VII p.d.C.), sedi te vite di Gjesù che al dîs: e je rivade l'ore.

Cheste, une volte e jere clamade la "prime domenie di passion" e a vegnivin cuvertis lis crôs: la antifone di jentrade de messe e comence a metinus tes tenebris interiôrs di Gjesù e dal just perseguitât.

Antifone di jentrade

cf. Sal 42,1-2

Fasimi justizie, Diu,
e pare la mê cause
de int cence cussience;
liberimi dai oms plens di falsetât e di tristerie,
za che tu sês tu il Diu che mi pare.

No si dîs Glorie a Diu.

Colete

Signôr, nestri Diu, danus la gracie
di cjatâsi, cul to jutori, ancje nô a cjaminâ cun pas rissolût,
su la strade di chê caritât ch'e à sburtât to Fi a consegnâsi a la muart
pal ben che i voleve al mont.
Pal nestri Signôr Gjesù Crist to Fi, ch'al è Diu
e cun te al víf e al regne dutune cul Spirtu Sant,
par duçj i secui dai secui.

PRIME LETURE

Gjer 31,31-34

O farasai un pat gnûf, no mi impensarai plui dai lôr pecjâts.

O sin a Gjerusalem tal ream di Gjôsie (640-609 p.d.C.) e i timps a son cambiâts. Il profete al sint che e scuen rivâ une aleance gnove fra Diu e il so popul: cumò Diu al ven, al torne par fâ un pat gnûf dopo di chel dal Sinai e par dâ une altre leç dopo chê dai dîs comadaments scrits tal clap: une leç scrite dentri de persone, dentri di lôr, sul lôr cûr.

Al è il nestri moment di vuê: jentrâts tune epoche gnove, tal postmoderni, o vin dibisugne ancje nô, come ai timps dal profete, di viodi Diu, l'om, il mont, il nestri Friûl e la nestre glesie cun altris vôi.

Diu, de bande sô, cu la sô peraule nus sigure: al è pront a une gnove aleance.

Dal libri dal profete Gjeremie

«Ve, a vignaran dîs – sentence dal Signôr! – ch'o farasai cu la cjase di Israel e cu la cjase di Gjude un pat gnûf. No come il pat ch'o ai fat cui lôr vons la dî che ju ai cjapâts pe man par fâju saltâ fûr de tiere dal Egjit, parcè che lôr a an tradît il gno pat, cun dut che jo o jeri il lôr Signôr – sentence dal Signôr! –. Ma il pat che jo o farasai cu la cjase di Israel sul finî di chei dîs al sarà chest – sentence dal Signôr! –: o

metarai la mê leç dentri di lôr e ur e scrivarai sul lôr cûr; jo o sarai il lôr Diu e lôr a saran il gno popul. E no si inscuelaran plui un cul altri disint: Ricognossêt il Signôr!, parcè che ducj mi ricognossaran, dal plui piçul al plui grant di lôr – sentence dal Signôr! – parcè che jo o perdonarai la lôr tristerie e no mi impensarai plui dai lôr pecjâts».

Peraule di Diu.

SALM RESPONSORIÂL

dal Salm 50

Il salm 50 (51) al reste un salm tant cjâr a la liturgjie e fedêl par compananus te nestre vite e spirtualitât. Vuê nus fâs domandâ di cambiâ il nestri cûr, intun spirt gnuf come che la prime leture nus domande.

R. Cree dentri di me un cûr mont, o Diu.

Se cjantât: Il cjant dai salms responsoriâi, p. 111.

Ve dûl di me, o Diu, parcè che tu sês bon,
e pal to grant bonvolê pare jù il gno pecjât;
lavimi di dutis lis mêis colpis,
smondeimi dal gno pecjât. **R.**

Torne a metimi intor un spirt che nol mole.
No sta parâmi lontan dai tiei vôi,
no sta lassâmi cence de tô sante soflade. **R.**

Tornimi la gjonde de tô salvece,
un spirt ben disponût che mi sostenti.
Ur insegnarai ai straviâts i tiei trois,
e di te a tornaran i pecjadôrs. **R.**

SECONDE LETURE

Eb 5,7-9

Al à imparât, patint, a ubidî e al è diventât risultive di salvece eterne.

Al è dûr e clâr il lengaç di chescj versetes de letare ai Ebreos. Il mandât che il Pari i veve dât a Gjesù al jere di salvâ la nestre umanitât simpri pierdude. Gjesù, tal so amôr al Pari e te compassion par nô al à ubidît, ma cheste sô libare decision i è costade grancj berlis e lagrimis.

Culi al è pôc ce studiâ, al è dome di rifleti sui sacrificis di Crist par nô, di contemplâlu tai siei patiments e di continuâ a tignîlu vuê. ringraziant, liberadôr tes nestris sclavitûts.

De letare ai Ebreos

Crist, tai dîs de sô vite sun cheste tiere, al à ufiert preieris e suplichis cun grancj berlis e lagrimis a di chel ch'al podeve sfrancjâlu de muart e al è stât scoltât pe sô ubidience. Seben ch'al jere Fi, al à imparât, patint, a ubidî e, dopo di jessi rivât al colm, al è diventât risultive di salvece eterne par ducj chei che i ubidissin.

Peraule di Diu.

CJANT AL VANZELI

Zn 12,26

R. Glorie e laut a ti, o Crist!

Se un mi servîs, ch'al vegni daûr di me, al dîs il Signôr,
e li ch'o soi jo al sarà ancje il gno servidôr.

R. Glorie e laut a ti, o Crist!

VANZELI

Zn 12,20-33

Se il grignel di forment colât in tiere al mûr, al bute une vore.

O sin a Gjerusalem; Gjesù al à acetade la muart che lu spiète e se il grignel di forment al à di murî, al murarà par començâ une societât umane gnove. Però cheste gnove umanitât inaugurate te muart

violente di Gjesù e fâs gole a ducj, ancje ai paians, culi rapresentâts di un pôcs di Grêcs, ancje ai agnostics, ai nichiliscj di vuê. Di fat îr e vuê al reste tal cûr de persone un desiderî: o varessin chê di viodi Gjesù.

Si cjacare tant di moderni e di postmoderni, di imigrâts, di forescj, di culturis e al è di just parcè che ancje il nestri Friûl al sta navigant viers une societât gnove fra int e mûts di vivi diferents. O vin ancje nô, come Gjesù, di savê murî a sigurecis che no àn sens par movisi in situazions, riflessions e relazions gnovis. Lis nestris comunitâts cristianis di paîs a àn di dâsi une muete. Il Signôr nus da l'esempli.

Al è ancje chest fâ Pasche. Une Pasche - passaç - di liberazion.

Dal vanzeli seont Zuan

In chê volte, jenfri di chei ch'a jerin lâts sù a adorâ intant de fieste, a 'nd jere ancje un pôcs di grêcs. Chei a fermarin Filip, chel di Betsaide di Galilee, e i domandarin: «Siôr, o varessin chê di viodi Gjesù». Filip al va a dîjal a Andree. Andree e Filip a van a dîjal a Gjesù. E Gjesù ur rispuindè: «E je rivade l'ore che il Fi dal om al sedi glorificât. In veretât, in veretât us dîs: se il grignel di forment, colât in tiere, nol mûr, al reste dibessôl. Ma s'al mûr, al bute une vore. Chel che i vûl ben a la sô vite le piert e chel che al odee la sô vite in chest mont le tignarà cont pe vite eterne. Se un mi servîs, ch'al vegni daûr di me e li ch'o soi jo al sarà ancje il gno servidôr. Se un mi servîs, il Pari lu onorarà. Cumò la mê anime e je conturbade e ce aio di dî? Pari, salvimi di cheste ore? Ma propit par chest o soi rivât a di cheste ore. Pari, glorifiche il to non». Alore e rivà une vôs dal cîl: «Lu ai glorificât e lu glorificarai ancjemò». Alore la int ch'e jere li e e veve sintût, e diseve ch'al jere stât un ton. Altris a disevin: «I à fevelât un agnul». Ur rispuindè Gjesù: «Nol è par me che si è fate sintî cheste vôs, ma par vualtris. Cumò al è il judizi di chest mont; cumò il princip di chest mont al sarà parât fûr. E cuant che jo o sarai alçât su de tiere, o tirarai ducj dongje di me». Chest lu diseve par fâur capî di ce muart ch'al stave par murî.

Peraule dal Signôr.

Si dîs O crôt.

Su lis ufiertis

Diu onipotent scoltinus,
e daspò di vênus inscuelâts inte fede cristiane,
pe virtût di chest sacrifici fasinus la gracie a nô, tiei servidôrs,
di jessi smondeâts di ogni sorte di mâl.
Par Crist nestri Signôr.

Antifone a la comunion

Zn 12,24-25

In veretât, in veretât us dîs: Se il grignel di forment,
colât in tiere nol mûr, al reste dibessôl;
ma, s'al mûr, al bute une vore.

Daspò de comunion

Diu onipotent,
daspò di vê comunicât al Cuarp e al Sanc di Crist,
danus la gracie di jessi simpri contâts sicu parts vivis di lui.
Lui ch'al vîf e al regne tai secui dai secui.

Preiere sul popul

Benedis la tô int, Signôr,
ch'e spiete il regâl dal to perdon,
e fâs ch'e puedi vê de tô gjenerositât
ce ch'e brame cu la tô ispirazion.
Par Crist nestri Signôr.

* * *

Riflession di pre Antoni Beline: Il grignel di forment

Un discors difìcil, intrigât e intrigôs, une robe paradossâl, grivie di capîle e di parâle jù, come chê de vôs dal cîl che un al fevelave di un ton e altris a fevelavin di un agnul, e Gjesù ur à dit che la vôs no jere par lui, ma par lôr. Il scandal de passion e de muart, al jere par lôr, no par lui, che al jere vignût jù dal cîl par fâ la volontât dal Pari.

La vôs di Diu e je simpri difìcil...

Vanseli par un popul, an B, p.54.

* * *

Cjants dal timp di Cuaresime

- Parce Domine, *n. 125*;
- Signore guardaci nel tuo amore, *n. 126*;
- O muse insanganade, *n. 128*;
- O capo insanguinato, *n. 129*;
- **O gran Pari di pietât, *n. 157***;
- O Signôr a schene plete, *n. 130*;
- Viers la cjase amade, o Pari, *n. 131*;
- Crist, Fi di Diu, ve dûl di nô, *n. 132*;
- Gno Diu, mê ruvîs là che mi pari, *n. 133*;
- Se il timp che Diu ti preste, *n. 134*;
- Come a l'aghe de fontane, *n. 135*;
- Quanta sete nel mio cuore, *n. 136*;
- Alla tua mensa, amato Salvatore, *n. 137*.

Salm dal Miserere, n. 50.

- Misere mei Deus, *n. 231*;
- Ve dûl di me, *n. 252; n. 253*.

Strade de crôs, *n. 138*;

Via crucis, *p. 285*.

Tal libri Hosanna, si puedin cjatâ ancjemò altris cjants e salms adats al timp di Cuaresime.

* * *

*Par començâ a jessi cristians
no covente une decision etiche
e nancje une grande pensade,
ma un incuintri cuntun fat,
cuntune Persone
che ti vierzin a un mont gnûf
e ti fasin cjapâ cun decision la strade olmade.*

Pape Francesc

* * *

Lunis 19: San Josef, om de sante Marie virgjine

Domenie 25: Domenie Ulive e de passion dal Signôr.

* * *

* *I cjants, salms e cjantadis a vegin ripuartâts cu la numerazion dal libri: Hosanna, Cjants e preieris*

dal popul furlan, Ed. Glesie Furlane, 2012.

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La nuova base.*

* *Par domandâ chescj libris scrivêt a info@glesiefurlane.org*